

La'o Hamutuk

Institutu Timor-Leste ba Monitor no Analiza Dezenvolvimentu

Rua Felicidade (Rua Cardoso Dias) Gricenfor, Bairro Central, Dili, Timor-Leste

P.O. Box 340, Dili, Timor-Leste Tel: +670-3321040 ka +670-77234330 (mobile)

email: laohamutuk@gmail.com Website: www.laohamutuk.org



Karta Submisaun

Parlamentu Nasionál Timor-Leste

Kona-ba

Proposta Lei de Promoção das Exportações

Dili 21 Janeiro 2026

Introdusaun

Ba dala uluk La'o Hamutuk hakarak apresia ba Governu Timor-Leste ba iniciativa hodi prodús lei de Promoção das Exportações, maski iha prosesu prodús proposta lei ida ne'e ami seidauk haree esforsu Governu nian atu oferese espasu konsultativu ne'ebé luan liu atu rona no hetan kontribuisaun analítiku husi parte interesadu sira..

Ezbosu proposta lei ida ne'e, La'o Hamutuk hetan husi prosesu informál la'ós pájina ofisiál no website Governu no Parlamentu Nasionál nian. La'o Hamutuk hanoin katak importante tebes atu comunidade, autoridade lokál akadémiku no sosiedade sivíl iha oportunidade bele iha diskusaun kona ba proposta lei nia impaktu sira. Governu no Parlamentu Nasionál tenke konsidera partisipasaun públiku iha konsultasaun no diskusaun ba ezbosu lei sira ne'ebé sei afeta ekonomia no povu nia moris iha futuru.

Maske laiha oportunidade formál ba organizasaun sosiedade sivíl no kamada sosiais sira atu partisipa iha konsultasaun ka audiénsia, La'o Hamutuk tenta hato'o ami nia rekomendasaun liu husi submisaun ida ne'e. Iha paresér ne'e ami fahe analiza jerál balu kona-ba ezbosu lei de Promoção das Exportações no fó rekomendasaun espesífiku ne'ebé ami konsidera prezisa iha mudansa hodi garantia katak ezbosu lejizlasaun sei hatán ba nesesidade ekonómika rai-laran, proteje povu no negósiu setór privadu nasional antes aprova.

Konteúdu Proposta Lei de Promoção das Exportações

Lei ne'e define setór esportasaun nu'udar pilár esensial ba dezenvolvimentu ekonómiku Timor-Leste nian, no nu'udar estratégia fundamentál ida atu harii ekonomia modernu, diversifikadu ne'ebé integra iha merkadu globál.

Objetivu husi lei ne'e maka prodús rejime ida ne'ebé simples, klaru no eficiente hodi fasilita prosesu esportasaun, aleinde ida ne'e lei ne'e mós sei haforsa setór privadu ho garantia sidadaun hotu bele partisipa no hetan tratamentu hanesan, dada investór estranjeiru no nudár pasu kompleta kritéria adezaun Timor-Leste ba Organizaasaun Mundiál Komérsiu (OMK) no ASEAN.

Ho prinsípiu iha Konstituisaun Repúblika no aliña ho kompromisu internasionál sira, lejjizasaun kona-ba esportasaun tenke hatán ba nesesidade ekonómika rai-laran, integra ho padraun sira ne'ebé iha relasaun ho investimentu privadu, impostu, alfándega no komérsiu esternu, aleinde respeita partikulármente administrativa sira país nian. Lejjizasaun konsidera Timor-Leste iha poténsia boot ba diversifika ekonomia no lokaliza priviléjii iha rejiaun ida ne'ebé dinámiku no kompetitivu liu iha mundu.

Estrutura lei organiza iha kapítulu sira ne'ebé trata kona-ba prinsípiu no matadalan jerál polítika esportasaun nian; liberdade sira, garantia no insentivu sira ba empreza esportadór sira, tuir prátika internasionál sira ne'ebé di'ak liu; no kondisaun sira ba asesu ba benefísiu sira, inklui kumpre ba padraun impostu no seguransa sosiál nian.

Analiza La'ó Hamutuk nian

Nasaun sira ne'ebé seidak dezenvolidu hanesan Timor-Leste, iha papél importante iha komérsiu globál tanba sai merkadu ba nasaun dezenvolidu sira ho oferese produtu ho kustu kí'ik no traballadór baratu. Dala barak hasoru dezafiu sira hanesan produsaun limitadu, dependénsia ba matéria prima sira, teknolojia ne'ebé limitadu, no kompetisaun maka'as ho nasaun sira ne'ebé dezenvolidu.

Importante atu konsidera katak lei sira ho nia objetivu fó oportunidade atu harii sistema komérsiu internasionál ne'ebé forte, presiza opta prinsípiu pro-povu; labele husik esportasaun hamosu défise ai-han doméstiku, fó prioridade uluk nesesidade doméstika, pro-produtór sira; ajuda agrikultór hasa'e produsaun ho promove ba indústria lokál no pro-ambiente; evita esplorasun ne'ebé makas liu hodi estragu ita nia ekolojia no halo ita-nia reziliénsia hasoru krize klimátika fraku.

Tanba ne'e antes aprova lei esportasaun Timor-Leste nian, presiza dezeña ho kuidadu atu optimiza lukru hodi ultrapasa bareira estruturál sira la'ós de'it kona-ba fa'an produtu sira, maibé mós harii reziliénsia ekonómika liuhosi diversifikasaun ekonomia.

Iha analiza tuir mai deskreve lakuna balun kona ba prinsípiu no sustentabilidade esportasaun, ne'ebé presiza atu diskute fila fali no tetu nia benefísiu no impaktu ba sociedade.

1. Efetividade Implementasaun Lei Esportasaun

Bainhira lejislasaun ida prodús iha situasaun ida ne'ebé Timor-Leste seidak iha indústriia ka produsaun ne'ebé adekuaudu atu esporta, mak sei fó impaktu sira hanesan;

- Lejislasaun la efetivu, sei hamosu kritika poténsial husi autór negósiu no sosiedade tanba regulamentu ba esportasaun la akompaña ho dezenvolvimentu industriál lokál.
- Governu bele aloka orsamentu ba instituisaun esportasaun ka halo prosedimentu sira, maibé ninian implementasaun sei la efetivu tanba produktu rai laran ne'ebé bele esporta ba seidak iha.
- Tempu no enerjia burokrátiku lakon hodi tau matan ba regulamentu sira ne'ebé seidak presiza.
- Lei ne'e labele fasilita de'it produktu nasaun seluk nian liu husi reesportasaun.

2. Sustentabilidade Produitu Esportasaun

Daudaun ne'e Timor-Leste seidak maximiza harii ninian infraestruturá no kapasidade produsaun, regulamentu esportasaun laho disponibilidade stók ne'ebé adekuaudu bele iha impaktu ne'ebé kompleksu liu duké iha nasaun dezenvolidu sira. Tanba ne'e, ajustamentu relatóriu sira tenke bazeia ba dados produsaun, intermu kuantidade no kualidade, la'ós de'it interese sira ba tempu badak.

Se esportasaun sira hetan lisensa maibé stók produitu limitadu, bele iha akumulasaun husi sub-koletor ka empreza intermediáriu sira entre agrikultór sira, governu no esportadór sira, ne'ebé sei perturba fornimentu doméstiku no ema kiak sira iha sidade ne'ebé depende ba folin ai-han ne'ebé la estavel bele hetan impaktu aat liu.

Parte seluk, maka bainhira Timor-Leste laiha sustentabilidade ba produsaun esportasaun maka sei lakon konfiansa husi kompradór internasionál.

3. Demanda Aas; Baze Produsaun Tenke Forte la'ós Setór Privadu mak Forte

Motivu lei deskreve katak : A criação de um setor privado robusto e capaz de gerar oportunidades para toda a população depende, em grande parte, da capacidade do país de se inserir no mercado internacional por meio da exportação de bens e serviços.

Klaru katak setór privadu—inklui empreza boot, kí'ik no médiu sira, no agrikultór independente sira hala'o papél kítiku ida hodi dudu esportasaun maibé sira la'ós autór primeiru, autór primeiru mak setór públiku, tanba setór públiku mak iha podér tomak atu kontrolu no garantia katak povu hetan duni oportunidade, la'ós setór privadu mak garantia povu ida ne'e hetan oportunidade.

Natureza esportasaun akontese tanba iha demanda aas husi nasaun dezenvolidu sira, atu hatán ba demanda mak produsaun tenke iha. Produsaun ne'e povu mak halo tanba ne'e, Estadu tenke duni hakbiit rekursu sidadaun nian no fó oportunidade populasau ho hodi hasa'e produsaun rai laran, tanba bainhira baze produsaun fraku mak sei lori dezafiu boot ba Timor-Leste iha futuru.

La'ó Hamutuk fiar katak bainhira ita haforsa baze produsaun populasau, hanesan hakbiit atividade ekonomia informál no harii ho haboot kooperativa ne'ebé orienta ba hasa'e produsaun, automatikamente sei lori benefísiu ba estadu no povu ida ne'e. Lei ida ne'e sei efetivu bainhira Timor-Leste iha nia produsaun suficiente ba demanda atuál lokál no halo esportasaun.

4. Investor Estranjeiru Sira, Sempre Interese Atu Investe Ba Nasaun Sira Ne'ebé Nia Lei La Pro Povu

Los katak lei ne'e sei atraí investor estranjeiru barak mai Timor-Leste. Tanba investor sira nia objetivu mak buka akumulá lukru, Timor-Leste nasaun ida ne'ebé oferese oportunidade ida ne'e ba sira. Tanba polítika públika ne'ebé prodús seidak pro povu, ba investor sira, ambiente Estadu ne'ebé la proteje nia povu; hafasil investor sira hodi halo monopóliu ba kustu merkadu, hetan traballadór baratu no mós hetan konfiansa husi kompañia boot sira husi nasaun dezenvolidu iha merkadu internasionál.

Konsekuénsia mak Timor-Leste iha futuru sei lidera husi setór privadu, no estadu sei lakon liu tan nia podér hodi halo kontrolu ba ninian ekonomia no proteje nian povu. La'ó Hamutuk hanoin katak prodús lejizlasau hanesan ne'e la'ós hanoin kona ba oinsá atraí investor mai Timor-Leste maibé importante mós atu garantia katak povu ida ne'e hetan protesau no benefísiu mós husi lejizlasau ne'ebé prodús.

5. Rekursu Umanu

Lejizlasau ne'e nu'udar estratéjia fundamentál ida atu harii ekonomia modernu, diversifikadu ne'ebé integra iha merkadu globál. La'ó Hamutuk hanoin katak atu atinje vizaun Estadu nian ho integra ba merkadu global, rekursu umanu hanesan baze fundamental tanba presiza forsa de traballu ida kualifikadu, hodi hamosu idea inovativu hodi kompete merkadu internasionál.

Bainhira Timor-Leste ninian rekursu umanu menus mak nasaun dezenvolidu sira ne'ebé iha kapitál investe iha Timor-Leste, sei domina hotu tranzasaun esportasaun ne'ebé iha merkadu internasionál, bainhira situasaun ida ne'e akontese, automatikamente sira ne'e sei hetan lukru barak liu duke ita, "Timor-Leste manán naran de'it, katak produktu ida mai husi Timor-Leste maibé la'ós profit". Istoría hatudu katak polítika merkadu livre ne'ebé harii husi OMK no ASEAN sempre hodi benefísiu barak liu ba nasaun dezenvolidu sira kompara ho nasaun terseiru mundu hanesan Timor-Leste.

6. Infraestrutura Lojística

Prepara infraestrutura lojística hanesan portu, estrada, laboratóriu, armazén, no transporte importante tebes bainhira halo regulamentu esportasaun, realidade iha Timor-Leste ita foin iha de'it portu seidauk iha laboratóriu ho estandar internasionál hodi halo teste produitu sira, armazén ne'ebé adekuaudu no transporte ne'ebé organizadu hodi hamenus risku ba entrega tarde.

Bainhira Timor-Leste la ho infraestrutura lojística ne'ebé di'ak, regulamentu sira ba esportasaun bele ladún efetivu tanba burokrasia sai neineik, kustu operasionál sira aumenta, produitu sira la to'o tuir tempu no kualidade sasán esportasaun susar atu mantén. Tanba ne'e, desenvolvimentu infraestrutura lojística tenke tuir preparasaun regulamentu esportasaun atu nune'e polítika ne'ebé halo ona bele implementa ho óptimu.

7. Lejizlasaun ne'e prodús atu kumpre kritéria adezaun TL ba Organizaun Mundiál Komérsiu (OMK) no ASEAN

Ho baze problema estrutural ne'ebé kompleksu iha TL, La'ó Hamutuk analiza katak lei ida ne'e nudár instrumentu ba satisfás de'it kritéria adezaun Timor-Leste ba Organizaun Mundiál Komérsiu (OMK) no ASEAN, tanba proposta lei ida ne'e la refleto ba kontextu real Timor Leste nian, iha ne'ebé ita prodús uluk lei sein prepara produitu atu esporta. Regulamentu esportasaun ne'ebé la hetan apoiu husi kapasidade produsaun bele konsidera fallansu polítika ne'ebé sei fó risku ba ekonomia rai laran.

Rekomendasaun

Nu'udar nasaun foun ne'ebé foin prodús ezbosu lei ba esportasaun, Timor-Leste bele foti pasu estratéjiku oioin hodi hametin ninia setór esportasaun. Atu atinje sustentabilidade esportasaun La'ó Hamutuk rekomena:

- Protesaun ba Produitu Esportasaun; Tenke garantia katak produitu ne'ebé atu esporta laiha implikasaun ba défise iha rai laran.
- Diversifikasaun Ekonomia; esportasaun sei sustentavel bainhira produitu sustentavel, tan ne'e ami rekomena urjentemente Timor-Leste tenke investimentu ba diversifika ekonomia iha área agrikultura, peska no floresta.
- Fó insentivu ba produtór ki'ik sira hodi hasa'e produsaun; atu garantia fonsionamentu lei mak tenke simultánea ho diversifikasaun ekonomia foka ba desenvolvimentu indústria lokál.
- Presiza identifika no dezenvolve merkadoria; diversifikasaun Produitu, dezenvolve produitu ne'ebé bele aumenta ninian kadeia valór (*value added*).
- Atu rezolve dependénsia ba merkadu no kompetisaun globál, Timor-Leste presiza rezolve liuhosi inovasaun, teknolojia, no kooperasaun internasionál.

- Dezenvolvimentu ba hasa'e produktu esportasaun tenke konsidera kestaun mudansa klimatika.
- Kria Polítika Graduál, porezemplu regulamentu esportasaun aplika de'it hafoin setór balu prontu ona. Se ida ne'e la akontese maka investór elite barak sei hetan nia benefísiu no povu lokál labele kompete.
- Taxa ba esportasaun presiza ajusta tuir merkadu internasionál, bainhira iha merkadu folin aas maka taxa aas no tun maka taxa tun
- Presiza superviziona didi'ak, regulamentu esportasaun bele uza abuzu podér no korrupsaun.
- Prepara Infraestruturura Lojístika hanesan portu modernu, laboratóriu standar internasionál, armazén, no transporte facilita prosesu esportasaun ho efetivu maibé kondisaun infraestruturura sira tenke simultánea no diversifikasaun ekonomia.
- Mitigasaun Risku no Estabilidade Polítika; garantia Legal ba Investidór sira: asegura serteza baze legál no estabilidade polítika hodi atraí investór estranjeiru sira.

Ikus liu La'ó Hamutuk espera lejislasaun ida ne'e la'ós nudár dokumentu hodi kompleta de'it ejiénsia regulamentu ba OMK no ASEAN, maibé tenke sai dokumentu polítiku ne'ebé bele atraí polítiku na'in sira hodi hakbiit povu Timor-Leste no investe ba hasa'e produsaun rai laran, diversifika ekonomia, hodi kontribui ba hamenus dependénsia ba importasaun. Ida ne'e mak ami hakarak hato'o ba atensaun no konsiderasaun hotu, la haluhan ami hato'o obrigada barak.

Ami be saran lia,



Marta da Silva



Celestino Gusmão



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia